



Los ntawm Thawj Tswj Hwm
Thomas S. Monson

Cia Li Tus

Muaj ib hnub ob peb xyos tas los lawm, tom qab kuv ua kuv tej hauj lwm hauv kuv hoob kas, kuv txais kev tshoov siab muaj zog kom mus xyuas ib tug poj ntsuam laus laus uas nyob hauv ib lub tsev laus nyob rau hauv Salt Lake City. Kuv txawm tsav tshab ncaj qha mus ntawd.

Thaum kuv txog nws chav pw, tsis muaj leej twg nyob hauv. Kuv nug ib tug kws ua hauj lwm seb nws nyob qhov twg thiab tus kws ua hauj lwm coj kuv mus rau ib qho chaw so. Nyob ntawd kuv ntsib tus poj ntsuam zoo zoo no uas nrog nws tus viv ncaus thiab ib tug phooj ywg tham. Peb tau sib tham ua ke.

Thaum peb sib tham, ib tug txiv neej tau los rau ntawm lub qhov rooj ntawm chav tsev ntawd xav yuav dej haus los ntawm ib lub tshuab muag khoom. Nws saib kuv thiab hais tias, “Nim no, koj yog Tom Monson los sav.”

Kuv teb tias, “Yog mas. Thiab koj muaj ntsis zoo li ib tug neeg xeeb Hemingway puas yog.”

Nws lees hais tias nws yog Stephen Hemingway, Alfred Eugene Hemingway tus tub, uas yog kuv ib tug pab cuam thaum kuv yog ib tug npisov ntau xyos tas los thiab kuv hu nws ua Gene. Stephen qhia kuv tias nws txiv nyob hauv tib lub tsev no hiab tsis ntev yuav tso lub ntiaj teb no tseg. Gene tau hu kuv lub npe, thiab nws tsev neeg xav tiv tauj kuv tiam sis lawv nrhiav tsis tau kuv tus naj npawb xov tooj rau kuv.

Kuv thov zam txim rau kuv thiab mus kias nrog Stephen mus saud rau chav tsev uas kuv tus pab cuam thaum ub pw hauv, muaj lwm tus ntawm nws cov me nyuam uas koom ua ke, es nws tus poj niam twb tso

lub ntiaj teb no tseg ob peb xyos tas los. Nws tsev neeg xav tias qhov uas kuv ntsib Stephen hauv qhov chaw so yog peb Leej Txiv Saum Ntuj Ceeb Tsheej txoj kev teb lawv tej kev thov xav kom kuv yuav pom lawv txiv ua ntej nws tuag thiab teb qhov uas nws hu kuv lub npe. Kuv twb xav hais tias lawv hais yog, vim yog Stephen tsis tau nkag hauv chav uas kuv tau mus xyuas tib lub sij hawm ntawd, ces kuv yeej yuav tsis paub tias Gene nyob hauv tsev saib xyuas ntawd.

Peb tau foom koob hmoov rau nws. Muaj kev kaj siab lug nyob ntawd. Peb tau sib tham zoo zoo, ces tom qab ntawd kuv tau ncaim lawv mus.

Hnub tom qab ntawd thaum sawv ntxov lawv hu xov tooj qhia kuv tias Gene Hemingway tau tso lub ntiaj teb no tseg—20 feeb tom qab kuv thiab nws tub tub tau foom koob hmoov rau nws.

Kuv tau thov Leej Txiv Saum Ntuj Ceeb Tsheej ua Nws tsaug rau qhov Nws coj kuv kev, uas tau tshoov kuv lub siab kom kuv mus xyuas lub tsev tu neeg laus ntawd thiab tau coj kuv mus ntsib kuv tug phooj ywg zoo Alfred Eugene Hemingway.

Thaum peb hnub tau tus Ntsuj Plig, koom ua ke txo hwj chim rau Vajtswv, thiab foom lub pov thawj hwj txoj koob hmoov,—kuv xav tias Gene Hemingway tau xav txog cov lus nyob hauv zaj nkauj qhuas Vajtswv hu ua “Xib Hwb, Muaj Cua Daj Cua Dub”:

Thov txhob mus, au kuv tus Txhiv Dim!

Thov txhob tso kuv tseg ntxiv.

Thaum kuv txog ntawm ntug hiaiv txwv kuv yuav so

Ua rau kuv zoo siab hlo li.

Kuv tseem nyiam zaj nkauj no thiab ua tim khawv txog zaj no qhov kev nplij siab:

*Txawm muaj cov cua daj cua dub los nplawm
Los dab hem los neeg thuam los raug dab tsi lawm,
Tsis muaj dab tsi ua rau lub nkoj yuav tog
Yog nyob nrog tus Tswv ntawm ntiaj teb tag nrho.
Tag nrho tej no yeej yuav mloog koj lus:
Cia li tus.¹*

Txawm los kua muag thiab raug txom nyem, txawm muaj kev ntshai thiab kev nyuaj siab, txawm tu siab thiab kho siab vim cov yus hlub tso lub ntiaj teb no tseg, yus yeej paub tias txoj sia yuav kav mus ib txhis. Peb tus Tswv thiab tus Cawm Seej yog tus tim khawv muaj txoj sia nyob uas qhia tias qhov no muaj tseeb.² Nws tej lus hauv vaj lug kub yeej txaus hais tias: “Cia li tus, thiab paub tias kuv yog Vajtswv” (Phau Ntawv Nkauj 46:10). Kuv ua tim khawv txog qhov tseeb no.

LUS CIM

1. “Master, the Tempest Is Raging,” *Hymns*, naj npawb 105.
2. Saib Richard L. Evans, “So Let Us Live to Live Forever,” *New Era*, Xya Hli Ntuj 1971, 18.

QHIA LOS NTAWM TSAB XOY NO

Zaj no nplij tau neeg lub siab uas tau xiam ib tug uas lawv hlub los sis cov uas muaj teeb meem kov yeej ib txoj kev txom nyem. Ntxiv rau Thawj Tswj Hwm Monson zaj lus, xav seb koj puas xav qhia txog ib nqe vaj lug kub nram qab no, raws li cov uas nej qhia tej kev xav tau: Yauj 19:25–26; 1 Kauleethaus 15:19–22; Mauxiyas 24:13–15; Doctrine and Covenants 122:7–9. Yog koj txais kev tshoov siab, tej zaum koj ua tim khawv tau txog kev kaj siab lug uas tus Cawm Seej tau muab rau koj thaum koj muaj kev nyuaj siab.

COV HLUAS

Thov Kho Kuv lub Siab

Los ntawm Kelsey LeDoux

Txog hnuab uas nco txog hnuab uas kuv tus nus hnuab tas sim neej, kuv xav txog lub sij hawm txij thaum nws tas sim neej los. Kuv nco qab txog kuv txoj kev mob siab heev thiab cov koob hmoov uas Vajtswv pub rau kuv thiab.

Kuv yeej tsis tau to taub yog vim li cas tib neeg yuav hais tias qhov uas ib tug lawv hlub tas sim neej yuav coj koob hmoov los rau lawv. Kuv tsis tau to taub hais tias kuv yuav ua li cas kom muaj kev xyiv fab thiab kev ris txiaj los ntawm ib qho uas ua rau kuv lub siab mob heev. Tiam sis muaj ib hmo uas ua rau kuv xav txawv.

Kuv tsim los thaum ib tag hmo es kuv lub siab mob kawg nkaus. Qhov mob loj ua luaj li. Kuv txhos caug thiab quaj thov rau kuv Leej Txiv Saum Ntuj Ceeb Tsheej. Tas kuv lub neej lwm tus qhia kuv txog txoj Kev Theej Txhoj thiab Yexus Khetos lub hwj chim kho neeg mob. Nim no ua rau kuv raug kev sim siab. Kuv puas ntseeg tiag tiag? Kuv thov kuv Leej Txiv Saum Ntuj Ceeb Tsheej kho kuv lub siab. Kuv nyiaj tsis tau qhov mob kuv tus kheej xwb.

Ces muaj ib qho kev kaj siab lug, kev nplij siab thiab kev hlub uas los thoob plaws kuv lub cev. Kuv xav tias zoo nkaus li Vajtswv puag kuv thiab tab tom pov hwm kuv ntawm qhov mob uas muaj hauv kuv lub siab. Kuv tseem nco kuv tus nus, tiam sis ua rau kuv pom qhov no txawv yav dhau los. Muaj ntau yam uas kuv kawm tau los ntawm qhov no.

Kuv paub tias yeej muaj tus Tswv txoj kev hlub thiab kev kaj siab lug. Peb yuav tsum txais xwb.

COV ME NYUAM

Xaiv Los Nyob Ntsiag To

Thawj Tswj Hwm Monson hais tias thaum peb nyob ntsiag to thiab tswm seeb, ces peb nyob kaj siab lug thiab peb zaj lus tim khawv txog peb Leej Txiv Saum Ntuj Ceeb Tsheej haj yam muaj zog. Thiab tus Vaj Ntsuj Plig Dawb Huv yuav tshoov peb lub siab pab peb paub pab lwm tus.

Sau los sis sib tham nrog koj niam koj txiv txog ib qho uas koj ua tau kom nyob ntsiag to. Ces siv sij hawm lub lim tiam no ua qhov ntawd. Tom qab koj ua, tej zaum koj sau tau rau hauv koj phau ceev xwm txheej txog koj tej kev xav thiab tej kev tshoov siab.

© 2013 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus As Kiv: 6/12. Pub txhais ua lus Hmoob: 6/12. Kev txhais *First Presidency Message, March 2013*. Hmong. 10663 295



Kev Ntseeg, Tsev Neeg, Kev Pab

Kev txhawb kev ntseeg

Ua tib zoo thov Vajtswv kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauv koj lub neej. Kom tau ntaub ntauv xov xwm ntxiv, cia li txuas rau reliefsociety.lds.org.

Peb tus yaj saub, Thawj Tswj Hwm Thomas S. Monson, tau hais kom pab “ncav tes los cawm cov uas xav tau pab txoj kev pab thiab txhawb nqa lawv mus rau txoj kev siab dua thiab txoj kev zoo dua. . . . Nov yog tus Tswv txoj hauj lwm, thiab thaum pab ua tus Tswv tej hauj lwm, . . . ces pab tsim nyog txais tus Tswv tej kev pab.”¹

Ntau xyoo tas los LaVene Call thiab nws tus khub mus saib xyuas tom tsev tau mus xyuas ib tug viv ncaus uas tsis tshua muaj siab ntseeg. Nkawd khob qhov rooj thiab ntsib ib tug niam tsev hluas uas hnav nws lub tsho khuam da dej. Zoo nkaus li nws muaj mob, tiam sis tsis ntev nkawd paub tias nws qhov teeb meem yog kev haus cawv. Ob tug uas saib xyuas tom tsev nrog tus niam tsev hluas no zaum thiab sib tham.

Tom qab nkawd mus lawm, nkawd hais tias, “Nws yog Vajtswv ib tug me nyuam. Peb muaj kev lav ris pab nws.” Nkawd thiaj mus xyuas nws ntau zaus. Txhua zaus, nkawd pom thiab hnov nws hloov ua zoo me ntsis. Nkawd thov tus viv ncaus no los koom lub Koom Haum Niam Tsev. Txawm nws tsis tshua xav mus, thaum kawg nws txawm mus. Tom qab nkawd yaum nws

ces nws thiab nws tus txiv thiab tus ntxhais tau koom lub koom txoos. Nws tus txiv hnov tau tus Vaj Ntsuj Plig Dawb Huv. Nws hais tias, “Kuv yuav ua raws li tus npisov hais.” Nim no lawv muaj siab rau ntseeg lub Koom Txoos thiab tau ua kev cai sib khi hauv lub tuam tsev.²

Los ntawm cov Vaj Lug Kub

3 Nifais 18:32; Doctrine and Covenants 84:106; 138:56

Los ntawm Peb zaj Keeb Kwm

Kev pab cov uas tau mus ua yuam kev rov qab los rau Yexus Khetos txoj moo zoo yeej yog ib feem ntawm kev ua ib tug Neeg Ntseeg hauv Hnub Nyooog Kawg thiab ib tug mej zeej ntawm lub Koom Haum Niam Tsev. Thawj Tswj Hwm Brigham Young (1801–77) hais tias, “Cia pab ib leeg muaj siab hlub ib leeg, . . . thiab cia cov uas txawj pom kev coj cov neeg dig muag mus txog thaum lawv pom kev lawv tus kheej.”³

Eliza R. Snow, Koom Haum Niam Tsev tus tuam thawj tswj hwm thib ob, tau ua tsaug rau cov viv ncaus tej dej num nyob hauv Ogden, Utah, USA, kom ib leeg txhawb ib leeg lub zog. Nws hais tias, “Kuv yeej paub tias muaj ntau yam uas yus

pub dawb [hais txog kev pab lwm tus] uas yeej tsis raug sau rau hauv tej phau ntauv ceev xwm txheej.” Tiam sis nws paub tias muaj ib phau uas lawv sau nyob saum ntuj ceeb tsheej txog cov viv ncaus tej dej num thaum lawv ncav tes los pab cov uas tsis tshua muaj siab ntseeg, nws hais tias: “Thawj Tswj Hwm Yauxej Xamiv hais tias tau tsa lub koom haum no kom cawm tau tib neeg. . . . Muaj ib phau ntxiv uas sau txog nej txoj kev ntseeg, nej txoj kev siab hlub, nej tej hauj lwm thiab tej lus zoo. . . . Tsis muaj dab tsi yuav ploj mus.”⁴

LUS CIM

1. Thomas S. Monson, “The Sacred Call of Service,” *Liahona*, Tsib Hlis Ntuj 2005, 55, 56.
2. Tsab ntauv rau Koom Haum Niam Tsev tuam pawg thawj tswj hwm los ntawm LaVene Call tus ntxhais.
3. Brigham Young, hauv *Daughters in My Kingdom: The History and Work of Relief Society* (2011), 107.
4. Eliza R. Snow, hauv *Daughters in My Kingdom*, 83.

Kuv Yuav Pab Li Cas?

- 1.** Kuv puas ua siab loj kom nug ib tug viv ncaus uas tsis tshua muaj siab ntseeg tuaj koom Koom Haum Niam Tsev txoj kev sib ntsib nrog kuv?
- 2.** Cov viv ncaus uas kuv saib xyuas puas txaus siab nug kuv tej yam txog txoj moo zoo?